

Mairg duine bhraitheas é féin!

[Tomás Ó Rathile: *Dánta Grádha*, no. 86; also published in *The Contention of the poets; an essay in Irish intellectual history* by John Minahane, Sanas Press, 2000, 54-57, with translation)]

Domhnall (mac Dáire) Mac Bruaideadha

1 Mairg duine bhraitheas é féin!  
mo bheart is dá héis do-chím;  
ní fhionnfa neach fir ná mná  
mo rún féin go bráth a-rís.

2 A bhean chumainn, a chruth fial,  
do bhí agam riamh i ngioll,  
[mairg léigeas a rún le mnaoi!]  
fuaire a chách a-taoi fám chionn.

3 Oram féin do fríth an locht, -  
ní beag nod dá chur i gcéill;  
tig an cumann druim-tar-ais,  
buailtear duine dá shlait féin.

4 Ní thiubhrthá orlach ar ór  
díom, a inghean is óg snuadh;  
ciodh gearr ó 'niugh gus i-né,  
do bhuaidhir mé an t-uisge suas.

5 Méad na toile tugais dúinn  
mairg dár gealladh, a ghnúis nár,  
umam féin ó 'taoi go fuar;  
comhfhada théid fuath is grádh.

6 Do chuala féin fad' ó riamh  
cumann deise do dhiall ruinn, -  
duine i Mumhain na múr ngeal  
díobh, is duine do Leath Chuinn.

7 Do bhádar dá bhliadhain déag  
an dá sgoiláir [fá sgéal suairc]  
gan deadhail - gá díochra searc  
ar fud Éireann teas is tuaidh?

8 D'éis a múinte i mbailtibh sgoil,  
dála an chúpla ar nách gclos béim,  
do thionnsgain gach duine dhíbh  
dol an tráth-soin dá thír féin.

9 Do b'iad ráite an fhir a-ndeas,  
's an sruth déar ag teacht re a ghruaidh:

“Ní dóigh go bhfaiceam, a ghrádh,  
gnúis a chéile go lá an Luain.”

10 “Dá dtí,” ar an sgoilár a-dtuaidh,  
“olc do cheachtar uainn dá bhríogh,  
ós ag deadhail dúinn ar ndias,  
go madh dhuitse bhias a dhíoth!”

11 D’éis ar gcumainn gus a-nocht  
ní mór, a bhean na bhfolt slim,  
nách í freagra an fhir a-dtuaidh  
fuaras uait ag sgaradh rinn.

12 Ní hí h’anshocracht ná t’fhearg,  
ní díth céille, ní ceard bhaoth,  
ní cruas, ní droichtheist, ní tnúth,  
do-bheir deadhail dún ar-aon.

13 Gan tú san chúige i mbíodh Meadhbh,  
nó i gcrích Laighean na learg réidh,  
nó i ndúthaigh Dheadhaidh mhic Shin, -  
tug mo dheadhail ribh rem ré.

14 Ní fhuarais, gidh meanma shaobh,  
a ghlac shocair gan taom gcruais,  
cúis mo thréigthe acht mé id ghar:  
maith gach cunnradh i bhfad uait!

15 Gach ar léigeas leat dom rún,  
a ghéag úr an aignidh shéimh,  
aithnim díot a cheilt ar chách  
go bráth bráth, ’s a cheilt ort féin!

16 Im ghar choidhche, is bím gan fear,  
a ghnúis díoghainn na ndearc mall,  
an fear leis nách beitheá réidh  
ní léigfinn féin ar chéad marg.

17 A stuaigh mhíolla na mbas ngeal,  
gé léige mo shearc i bhfaill,  
fuaire id thoil ní thugas fós;  
mo sgaradh riot gá mó mairg?